

La delibare dal Consei dai ministris e conferme la validitât des sieltis strategjichis de Universitât pe tutele e promoziun dal furlan

Ratifiche de Cjarte europeane des lenghis minoritariis: la sodisfazion de retore

Il retôr de Universitât di Udin, **Cristiana Compagno**, al salute cun sodisfazion la ratifiche de bande de Italie - cun delibare dai

9 di Març dal Consei dai ministris - de "Cjarte europeane des lenghis regionâls o minoritariis". La ratifiche de Cjarte e rapresente l'acueiment formâl de stesse, dal moment che la Italie e je intervignude in materie za intal 1999 cun leç specifiche 482, che e ricognòs 12 lenghis regionâls o minoritariis pal nestri País: albanês, catalan, gjermanic, grêc, sloven, cravuat, francês, franc-provenzâl, furlan, ladin, occitan e sart.

«E je une notizie tant positive – e coment Compagno – al è un at che al fâs so un impegn cjapât dal Stât in maniere formâl za intal 1992 e che al cjate, cumò, just coronament. La impuartance che lis Istituzions europeanis a assegnin ae promoziun des lenghis regionâls e minoritariis nus conferme inte bontât des sieltis strategjichis fatis de Universitât dal Friûl. A son sieltis che a viodin inte valorizazion de lenghe e de culture furlane, ma ancje di chês slovene e di chês gjermaniche propriis dal nestri teritori regionâl, elements fundamentâls e cualificants de

aziun dal nestri Ateneu».

De bande dal retôr, cun di plui, l'auguri «che il gnûf clime di favôr su la cuistion e preludi a une

jevade dai nivei di tutele e, in paralêl, ae destinazion di risorsis in stât di sostignî progjets e iniziativis buinis che a consintin di preservâ il patrimoni linguistic e duncje storic e culturâl dai teritoris».



Cristiana Compagno

La "Cjarte europeane des lenghis regionâls o minoritariis" e je stade adotade tant che convenzion dal Comitât dai ministris dal Consei di Europe ai 25 di Jugn dal 1992 e e je stade firmade a Strasburc ai 5 di Novembar dal stes an di duj i Stâts membrs. Travers chest tratât, jentrât in vore al prin Març dal 1998, i País de Union Europeane si impegnin a tutelâ e promovi lis lenghis minoritariis e regionâls cognossudis, pes cualis al ven, cussì, previodude la pussibilitât di insegnament intes scuelis, di jessi dopradis tes circoscrizions judiziariis, e di jessi difondudis travers programs culturâi e mieçs di comunicazion. Cu la ratifiche de bande de Italie, la Cjarte e risulte duncje, a vuê, ratificade de bande di 25 dai 33 Stâts europeans firmataris.